

欽定天文正義

欽定天文正義卷七十四

流星占考

流星占考

星隕占考附

春秋魯莊公七年夏四月辛卯夜中星隕如雨左傳星隕如雨

與雨偕也

僖公十六年春王正月戊申朔隕石于宋五左傳隕星也

秦始皇三十六年熒惑守心有墜星下東郡至地為石

漢惠帝三年隕石縣諸一

孝武帝元光中天星盡搖上以問候星者對曰星搖者民勞也

後伐四夷百姓勞于兵革征和四年二月丁酉隕石雍二

天晏無雲聲聞四百里

昭帝始元中流星下燕萬載宮極東去法曰國恐有誅元平

元年二月甲申辰有大星如月有衆星隨而西行大星如月
大臣之衆衆星隨之衆皆隨從之象也天文以東行為順西
行為逆此大臣欲行權以安社稷三月丙戌流星出翼軫東
北于太微入紫宮始出小旦入大有光入有頃聲如雷三鳴
止

元帝建昭元年正月戊辰隕石梁國六

成帝建始元年九月戊子有流星出文昌色白光燭地長可四
丈大一圍動搖如龍蛇形有頃長五六丈大四圍所誣折委
曲貫紫宮西在斗西北于亥間後誣如環北方不合留一刻
訖占曰文昌為上將貴相時帝弟王鳳為大將軍其後宣帝

子王商為丞相，皆貴重任政。鳳妬商，譖罷商，自殺親屬，皆廢黜。四年正月癸卯，隕石膏四肥累一。陽朔三年二月壬戌，隕石白馬八。四年閏月庚午，飛星大如缶，出西南入斗。下占曰：漢使匈奴明年單于死，漢遣使往吊。鴻嘉二年五月癸未，隕石杜衍三。永始二年二月癸未，夜過中星，隕如雨，長一二丈，繹繹未至地，滅至鷄鳴止。谷永對曰：日月星辰燭照下土，其有石隕之異，則遐邇幽隱靡不咸睹。星辰附麗於天，猶庶民附離者也。王者失道，綱紀廢頓，下將叛去，故星叛天而隕，以見其象。春秋記異，星隕最大。自魯莊以來至今。

再見臣聞三代所以喪亡者皆繇婦人羣小湛酒于酒書云
乃用婦人之言四方之道逃多罪是信是使詩曰赫赫宗周
褒姒威之顛覆厥德荒沈于酒及秦所以二世而亡者養生
大秦奉終大厚方今國家兼而有之社稷宗廟之大憂也
元延元年三月隕石都關一四月丁酉日舖時天暝晏股股
如雷聲有流星頭大如缶長十餘丈皎然赤白色從日東南
去四面或大如盂或如雞子燿燿如雨下至昏止郡國皆言
星隕春秋星隕如雨為王者失勢諸侯起伯之異也 綏和
元年正月辛未有流星從東南入北斗長數十丈二刻所息
占曰大臣有繫者其年十一月庚子定陵侯淳于長坐執左
道下獄死

哀帝建平元年正月丁未隕石北地十其九月甲辰隕石虞二
平帝元始二年六月隕石鉅鹿二

光武建武十年三月癸卯流星如月從太微出入北斗魁第六
星色白旁有小星射者十餘枚滅則有聲如雷食頃止流星
為貴使星大者使大星小者使小太微天子廷北斗魁主殺
星從太微出抵北斗魁是天子大使將出有所伐殺十二月
己亥大流星如岳出柳西南行入軫且滅時分為十餘如遺
火狀須臾有聲隱隱如雷柳為周軫為秦蜀大流星出柳入
軫者是大使從周入蜀是時光武帝使大司馬吳漢發南陽
卒三萬人乘船泝江而上擊蜀十二年十一月丁丑敗公孫

述兵殺述明日漢入屠蜀城誅述大將公孫晃延岑等所殺
數萬人夷滅述妻宗族萬餘人以上是大將出伐殺之應也
其小星射者及如遺火分為十餘皆小將相隨之象有聲如
雷隱隱者兵將怒之徵也 十二年正月己未小星流百枚
以上或西北或正北或東北二夜止六月戊寅晨小流星百
枚以上四面行小星者庶民之類流行者移徙之象也或西
北或東北或四面行皆小民流移之徵是時西討公孫述北
征盧芳匈奴助芳侵邊漢騎將軍馬武騎都尉劉納闔興軍
下曲陽臨平呼沱以備胡匈奴入河東中國未安米穀荒貴
民或流散後三年吳漢馬武又徙鴈門代郡上谷關西縣吏

民六萬餘口置常關居庸關以東以避胡寇是小民流徙之
應十月丁卯大星流有光發東井西行聲隱隱陰陰都萌占曰流
星出東井所之國水 中元二年十月戊子大流星從西南
東北來聲如雷流星為使中即將竇固楊虛侯馬武等將兵
西征也

孝明永平元年四月丁酉流大如斗起天市樓西南行光照地
流星為外兵西南行為西南夷是時益州祭兵擊姑復蠻夷
大年替滅陵斬首傳詣洛陽 七年流星大如杯從織女西
行光照地織女天之真女流星出之女主憂

孝章建初元年二月甲寅流星過紫宮中長教文散為三滅為

大人忌 六年七月丁酉夜有流星起軒轅大如拳歷文昌
餘氣正白向西如文昌久久乃滅

孝和永元元年正月辛卯有流星起參長四又有光色黃白二
月流星起天棊東北行三丈所滅色青白壬申夜有流星起
太微東蕃長三丈三月丙辰流星起天津壬戌有流星起天
將軍東北行參為邊兵天棊為兵太微天廷天津為水天將
軍為兵流星起之皆為兵其六月漢遣車騎將軍竇憲執金
吾耿秉與度遼將軍鄧鴻出朔方並進兵臨私渠北鞬海斬
首萬餘級獲生口牛馬羊百萬頭日逐王等八十一部降凡
三十餘萬人追單于至西海是歲七月又雨水漂人民是其

應也 二年二月丁酉有流星大如桃起紫宮東蕃西行五
丈稍滅四月丙辰有流星大如瓜起文昌東北西南行至少
微西滅有頃音如雷聲八月丁未有流星如鷄子起太微西
東南行四丈所消十月癸未有流星大如桃起天津西行六
丈所消十一月辛酉有流星大如拳起紫宮西行到胃消
三年九月丁卯有流星大如鷄子起紫宮西南至北斗柄間
消紫宮天子宫文昌少微為貴臣天津為水北斗主殺流星
起歷紫宮文昌少微天津文昌為天子使出有兵誅也竇憲
為大將軍與其弟篤景女弟壻郭舉等坐謀不軌伏誅 六
年六月己丑流星大如桃起參北西至參尾南消有光 七

年正月丁未有流星起天津入紫宮中滅色青黃有光 八
年九月辛丑夜有流星大如拳起婁 十一年五月丙午流
星大如瓜起氐西南行稍有光白色占曰流星白為有使客
大為大使小亦小使疾期疾遲亦遲大如瓜為近小行稍有
光為遲也又正王日邊方有受王命者也明年二月蜀郡旄
牛徼外夷白狼樓薄種王唐繒等率種人口十七萬歸義內
屬賜金印紫綬錢帛 十四年十一月丁丑有流星大如拳
起北斗魁中北至閣道稍有光色赤黃須臾西北有雷聲
十六年十月辛亥流星起鉤陳北行三丈有光色黃 元興
元年二月庚辰有流星起角亢五丈所四月辛亥有流星起

斗東北行到須女七月己巳有流星起天市五丈所光色赤
閏月辛亥流星起斗東北行至須女須女燕地天市為外軍
其年遼東宿人反鈔六縣發上谷漁陽右北平遼西烏桓討
之

陽帝延平元年九月隕石陳留四傳曰隕星也董仲舒以為從
高反下之象或以為庶人惟星隕民困之象也

順帝永和三年二月辛丑有流星大如斗從西北東行長八九
尺色黃赤有聲隆隆如雷

桓帝延熹七年二月癸亥隕石右扶風一郡又隕石二皆有聲

如雷

靈帝光和元年四月癸丑流星犯軒轅第二星東北行入北斗魁中流星為貴使軒轅為內宮北斗主殺是天子大使將出有伐殺也至中平元年黃巾賊起上遣中即將皇甫嵩等征之斬首十餘萬級 中平中夏流星赤如火長三丈起河鼓入天市抵觸宦者星色白長三丈後尾再屈食頃乃滅狀似枉矢占曰枉矢流發其宮射所謂矢當直而枉者操矢者邪枉人也六年大將軍何進謀盡誅中官中官覺于省中殺進俱而破滅天下遂大壞亂

蜀後主建興十三年諸葛亮率大眾伐魏屯于渭南有長星赤而芒角自東北西南流投亮營三投再還往大還小占曰兩

軍相當有大流星來走軍上及墜軍中者皆破敗之徵也九月
月亮卒于軍焚營而退羣帥交怒多誅殘

魏明帝景初二年宣帝圍公孫文懿于襄平八月丙寅夜有大
流星長數十丈白色有芒鬣從首山東北流墜襄平城東南
占曰圍城而有流星來走城上及墜城中者破又曰星墜當
其下有戰場九月文懿突圍走至星墜所被斬屠城坑其衆
元帝景元四年六月有大流星二並如斗見西方分流南北光
照地隆隆有聲按占流星為貴使星大者使大是年鍾鄧尅
蜀二星蓋二帥之象二帥相背又分流南北之應鍾會既叛
三軍憤怒隆隆有聲兵將怒之徵也

晉武帝泰始四年七月星隕如雨皆西流占曰星隕為百姓叛

西流吳人歸晉之象也 太康九年八月壬子星隕如雨

惠帝太安二年十一月辛巳有星晝隕中天北下光變白有聲

如雷按占曰營首營首所在下有兵流血明年劉石攻峽

并州多所殘滅王俊起燕代引鮮卑攻掠鄴中百姓塗地有

聲如雷怒之象也 永興元年七月乙丑星隕有聲 二年

十月星又隕有聲

晉懷帝永嘉元年九月辛卯有大星如日自西南流于東北小

者如斗相隨天晝赤聲如雷占曰流星為貴使星大者使大

是年五月汲桑殺東燕王騰遂據河北十一月始遣和郁為

征北將軍鎮鄴西田甄等大破汲桑斬于樂陵于是以甄為汲郡太守弟蘭鉅鹿太守小星相隨者小將副帥之象也司馬越怒魏郡以東平原以南皆黨于桑以賞甄等于是侵掠桑地有聲如雷忿怒之象也

元帝永昌元年七月甲午有流星大如筥長百餘丈青赤色從西方來尾分為百餘岐或散時王敦亂百姓流亡之應也

成帝咸康三年六月辛未流星大如二斗魁色青赤光耀地出

奎中沒婁北按占為饑五穀不藏是月大旱饑六年二月

庚午朔有流星大如缶光耀地出天市西北入太微占曰大人當之

穆帝永和八年六月辛巳日未入有流星大如三斗魁從辰巳
上東南行晷度推之在箕斗之間蓋燕分也按占為營首營
首之下流血滂沱是時慕容儁僭稱大燕攻伐無邑 十年
四月癸未流星大如斗色赤黃出織女沒造父有聲如雷占
曰燕齊有兵百姓流亡其年十二月慕容儁據臨漳盡有
幽并青冀之地緣河諸將奔散河津隔絕慕容恪攻齊

海西公太和四年十月壬申有大流星西下有聲如雷明年遣
使免袁真為庶人桓溫征壽春真病死息瑾代立求救于符
堅溫破符堅軍六月壽春城陷

孝武太元六年十月乙卯有奔星東南經翼軫聲如雷占曰楚

地有兵軍破百姓流亡十二月符堅荊州刺史梁成襄陽太
守閻震率眾伐竟陵桓石虔擊大破之生擒震斬首七千獲
生口萬人聲如雷將帥怒之象也 十三年閏月戊辰天狗
東北下有聲占曰有大戰流血自是後慕容垂翟遼姚萇符
登慕容永並阻兵爭強 十四年正月彭城妖賊又稱偽號
于皇邱劉牢之破滅之三月張道破合鄉太山向欽之擊破
之

安帝隆安五年三月甲寅流星赤色衆多西行經牽牛虛尾天
津閭道貫太微紫宮占曰星庶人類衆多西行衆將西流之
象經天子庭主弱臣強諸侯兵不制其年五月孫恩侵吳郡

殺內史六月至京口于是內外戒嚴營陣屯守劉裕追破之
元興元年七月犬飢人相食浙江以東流亡十六七吳郡
吳興戶口減半又流奔而西者萬計十月桓元遣將擊劉軌
破走之軌奔青州

宋文帝元嘉十年十二月有流星大如甕尾長二十餘丈

梁武帝天監十年九月丙申天西北隆隆有聲赤氣下至地占

曰天狗也所往之鄉有流血其君失地其年十二月馬仙琕

大破魏軍斬馘十餘萬克復照山城 中大通四年七月甲

辰星隕如雨占曰星隕陰失其位災害之象萌也星隕如雨

人民叛下有專討大人憂 太清三年有流星長三十丈

元帝承聖元年十二月星隕吳郡 三年十一月周人圍江陵

有流星墜城中

陳文帝天嘉六年三月丁卯日入後衆星未見有流星白色大如斗從太微間南行尾長尺餘占曰有兵與喪

後魏道武帝登國四年三月丁未有大流星東南行尾屬地六七丈有聲 九年有星墜于河北聲如雷震光明燭天地

文成帝興安元年五月辛亥流星大如五斗許西南為六七段

有聲

獻文帝大安元年十一月乙酉有流星照地啾啾有聲

孝靜帝武定四年九月丁未高祖圍玉壁城有星墜于營衆驢皆鳴占曰破軍殺將

周武帝天和三年二月庚午有流星大如斗出在攝提流至天津滅有聲如雷建德六年十二月癸丑流星大如月西流有聲蛇行屈曲光照地占曰兵大起下有戰場戊辰平旦有流星大如三斗器色赤出紫宮凝着天乃北下

宣帝大象元年六月丁卯有流星大如鷄子出氐中西北流有尾迹長一丈所入月中即滅己丑有流星一大如斗色青有光明照地出營室抵壁入濁二年四月乙丑有星大如斗出天厨流入紫宮抵鈎陳乃滅占曰有大喪兵大起將軍戮五月甲辰有流星一大如三斗器出太微端門流入翼色青

白光明照地聲若風吹幡旒七月壬子有流星大如斗出五
車東北流光明燭地

隋文帝開皇元年十一月己巳有流星聲如墮牆光燭地占曰
流星有光有聲名曰天保所墜國有喜其九年平陳天下一
統 五年八月戊申有流星數百四散而下占曰小星四面
流行者唐人流移之象其九年平陳江南士人悉播遷京師
煬帝大業十一年十二月戊寅大流星如斛墜賦廬明月營破
其衝朝壓殺十餘人占曰奔星所墜破軍殺將其年王克擊
廬明月城破之 十二年五月癸巳大流星墮于吳郡為石
占曰有大戰破軍殺將其後大軍破逆賊劉元進於吳郡八

月壬子有大流星如斗出王良閣道聲如墮牆癸丑大流星如甕出羽林十三年五月辛亥大流星如甕墜于江都

唐高祖武德三年十月己未有星隕于東郡隱隱有聲

太宗貞觀二年天狗隕于夏州城中十四年八月有星隕于

高昌城中十六年六月甲辰西方有流星如月西南行三

丈乃滅占曰星甚大者為人主十八年五月流星出東壁

有聲如雷占曰聲雷者怒象十九年四月己酉有流星向

北斗柄杓而滅

高宗永徽三年十月有流星貫北極四年十月十日睦州女

于陳石真反婺州刺史崔義元討之有星隕于賊營乾封

元年正月癸酉有星出太微東流有聲如雷、咸亨元年十一月西方有流星聲如雷、調露元年十一月戊寅流星入北斗魁中、乙巳流星燭地有光使星也

中宗神龍三年、三月丙辰有流星聲如顏牆光燭天地、景龍二年、二月癸未有大星墮于西南、聲如雷、野雉皆唯

睿宗景雲元年、八月己未有流星出五車至上台滅、九月甲申有流星出中台至相滅、太極元年正月辛卯有流星出太微至相滅、延和元年六月、幽州都督孫佺討奚契丹出師之夕、有大星墮于營中、

明皇開元二年、五月乙卯晦有星西北流、或如甕、或如斗、貫北

極小者不可勝數天星盡搖至曙乃止占曰星民象流星者失其所也漢書曰星搖者民勞十二年十月壬辰流星大如桃色赤黃有光燭地占曰色赤為將軍使天寶三年閏二月辛亥有星如月墜于東南墜後有聲

肅宗至德二年賊將武令珣圍南陽四月甲辰夜中有大星赤黃色長數十丈光燭地墜賊營中十一月壬戌有流星大如斗東北流長數丈蛇行屈曲有碎光迸出占曰是謂枉矢

代宗廣德二年六月丁卯有妖星隕于汾州十二月丙寅自乙夜至曙星流如雨大曆二年九月乙丑晝有星如一斗器色黃有尾長六丈餘出南方沒於東北東北於中國則幽州

分也 三年九月乙亥有星大如斗北流有光燭地占為貴
使 六年九月甲辰有星西流大如一斗器光燭地有尾迸
光如珠長五丈出婺女入天市南垣滅 八年六月戊辰有
流星大如一升 十年三月戊戌有流星出于西方如二升
器有尾長二丈入濁 十二年二月辛亥有流星如桃尾長
十丈出貌瓜入太微

德宗建中四年八月庚申有星隕于京師 興元元年六月戊
午星或什或伍而隕 貞元三年閏五月戊寅柱矢墜于虛
危 十四年閏五月辛亥有星墜于東北光燭如畫聲如雷
憲宗元和二年十二月己巳西北有流星亘天尾散如珠占曰

有貴使

四年八月丁丑西北有大星東南流聲如雷鼓

六年三月戊戌日晡天陰寒有流星大如一斛器墜于宛鄆
間聲震數百里野雉皆雊所墜之上有赤氣如立蛇長丈餘
至夕乃滅時占者以為日在戌魯分也 九年正月有大星
如半席自下而升有光濁地羣小星隨之四月辛巳有大流
星尾迹長五丈餘光燭地至右攝提西滅 十二年九月己
亥甲夜有流星起中天首如甕尾如二百斛船長十餘丈聲
如羣鴨飛明如火炬過月下西流須臾有聲礮礮墜地有大
聲如壞屋者三在陳蔡間 十四年五月己亥有大流星出
北斗魁長二丈餘南抵軒轅而滅占曰有赦赦視星之大小

十五年七月癸亥有大星出鉤陳南流至婁滅

穆宗長慶元年正月丙辰有大星出狼星北色赤有尾迹長三丈餘光燭地東北流至七星南滅七月乙巳有大流星出參西北色黃有尾迹長六七丈光燭地至羽林滅八月辛巳東北方有大星自雲中出色白光燭地前銳後大長二丈餘西北流入雲中滅二年四月辛亥有流星出天市光燭地隱隱有聲至卽位滅市者小人所聚卽在天建中主宿衛閏十月丙申有流星大如斗抵中台上星三年八月丁酉夜有大流星如數斗器起西北經奎婁東南流去月甚近迸光散落墜地有聲四年七月乙卯有大流星出天船犯斗魁樞

星而滅占曰有舟楫事丙子有大流星出天將軍東北入濁
敬宗寶曆元年正月乙卯有流星出北斗樞星光燭地入濁占
曰有獻 二年五月癸巳西北有流星長三丈餘光燭地入
天市中滅占為有誅七月丙戌日初入東南有流星向南滅
以晷度推之在箕斗間八月丙申有大流星出王良長四丈
餘至北杓滅王良奉車御官也

文宗太和四年六月辛未自昏至戊夜流星或大或小觀者不
能數 七年六月戊子自昏及曙四方流星大小縱橫百餘
八年六月辛巳夜中有流星出河鼓赤色有尾迹光燭地
迸如散珠北行近天棓滅有聲如雷河鼓為將軍天棓者帝

之武備。九年六月丁酉自昏至丁夜流星二十餘縱橫出沒多近天漢。開成二年九月丁酉有星大如斗長五丈自室壁西北流入大角下沒行類枉矢中天有聲小星數百隨之十一月丁丑有大星墮于興元府署寢室之上光燭庭宇。三五年月乙丑有大星出於柳張尾長五丈餘再出再沒。四年二月乙亥丁夜至戊夜四方中天星流大小凡二百餘並西流有尾迹長二丈至五丈八月辛未流星出羽林有尾迹長八丈餘有聲如雷羽林天軍也。

武宗會昌元年六月戊辰自昏至戊夜小星數十縱橫流散占曰小星民象七月庚午北方有星光燭地東北流經王良有

聲如雷十一月壬寅有大星東北流光燭地有聲如雷 四
年八月丙午有大星如炬火光燭天地自奎婁掃北方七宿
而隕 六年二月辛亥夜中有流星赤色如桃光燭地有尾
迹貫紫微入濁

懿宗咸通六年七月乙酉甲夜有大流星長數丈光燦如電羣
小星隨之自南徂北 十三年春有二星從天際而上相從
至中天狀如旌旗乃隕

僖宗乾符二年冬有二星一赤一白大如斗相隨東南流燭地
如月漸大光芒猛怒 三年晝有星如炬火大如五升器出
東北徐行隕于西北 四年七月有大流星如盂自虛危歷

天市入羽林，滅占為外兵。光啟元年八月己丑夜，星隕如雨，或如杯，如椀者，文流如織。庚寅夜亦如之。至丁酉止。三年十一月夜，星隕于西北，如雨。光啟二年九月有大星隕于揚州府署，延和閣前，聲如雷，炎光燭地。十月壬戌有星出於西方，色白，長一丈五尺，屈曲而隕，占曰：長庚也。下則流血。三年五月，秦宗權擁兵于汴州北郊，畫有大星隕于其營，聲如雷，是謂營頭，其下破軍殺將。

昭宗乾寧元年夏，有星隕于越州，後有光長丈餘，狀如蛇，或曰枉矢也。三年六月，天暴雨，雷電有星大如椀，起西南墜于東北，色如鶴練，聲如羣鴻飛，占為姦謀。光化元年九月丙

子有大星墜于北方 三年三月丙午有星如二十斛船色
黃前銳後大西南行十一月中天有大星自東緩流如帶屈
曲光澀著天食頃乃滅是謂枉矢 天復三年二月帝至自
鳳翔其明日有大星如月自東濁際西流有聲如雷尾迹橫
貫中天三夕乃滅 天祐二年三月乙丑夜中有大星出中
天如五斗器流至西北去十丈許而止上有星芒炎如火赤
而黃長丈五許而蛇行小星皆動而東南其隕如雨少頃沒
後有蒼白氣如竹叢上衝天中色蒼青占曰亦枉矢也

梁太祖乾化元年十一月甲辰夜東方有流星如數升器出畢
宿口曳光三丈餘有聲如雷

後唐莊宗同化三年六月甲申衆星交流丙戌衆星交流庚寅
夜一鼓西南有流星約七十餘皆有尾迹西南流其年七月
辛卯衆小星流于西南九月丁未天狗墜有聲如雷野雉皆
雊、

明宗天成元年六月乙未衆小星交流 二年三月庚申衆小

星流于西北 長興元年九月辛酉衆小星交流而墜丙戌

夜二鼓初東北方有小流星入北斗魁滅至五鼓初西北方

次北有流星狀如半升器初小後大速流入奎滅尾迹凝天

屈曲似雲而散光明燭地又東北有流星加大挑出下台星

向西北速流至斗柄第三星旁滅五鼓後至明中天及四方

有小流星百餘流注交橫六月庚午衆星交流七月乙亥朔
衆星交流

閔帝應順元年二月丁酉衆星流于西北

宋帝清泰元年九月辛丑夜五鼓初有大星如五斗器西南流
尾迹長數丈色赤移時盤屈如龍形蹙縮如二鐸相聞而散
又一星稍小東流有尾迹澀成白氣食頃方散

晉高祖天福三年三月壬申夜四鼓後東方有大流星狀如三
升器其色白尾迹長二丈餘屈曲流出河鼓星東三尺東流
丈餘滅

周世宗顯德元年正月庚寅有大星墜有聲如雷牛馬皆逸京

城以為晚鼓皆伐鼓應之 三年正月癸亥五鼓後有大星
出南斗東北流丈餘滅

宋太祖建隆元年正月戊午有星出東北方如半升器青赤色

北行初小後大尾迹斷續光燭地九月癸亥有星出昴大如

在十二月戊辰有星如半升器青赤色出參旗西南慢行而

沒蒼光燭地 三年五月乙丑天狗墮西南占曰其地有兵

王師討西蜀孟昶既降草寇連年方定 四年二月丙午有

星如桃色赤如弧矢東南沒有光明 乾德二年二月乙丑

有星如三升器黃白色出太微五帝南連行至外厨沒其體

散落光燭地 三年六月丁巳有星如桃色黃赤出北斗魁

經太微垣北過角西漸大行五尺餘沒尾迹凝天有光明十
二月丁巳有星天出河青白色南行至天倉沒初小後大如
半升器光燭地 四年正月乙未，有星出社星，青白色速行，
尾迹三丈餘，初小後大，沒有光明，四月甲寅，有星出天乳，青
赤色如升器，東南行貫房，沒光燭地，閏八月己丑，有星出天
船如升器，青白色西北速行，沒於文昌， 五年七月戊子，有
星出大角如升器，青白色北行，沒明燭地， 六年六月己卯，
有星出河鼓如升器，慢行，明燭地， 開寶三年九月庚午，廣
州民見衆星皆北流，知星者言劉氏當舉國以歸中原，明年
廣南平， 四年八月辛卯，有星出織女西北行，尾迹三丈餘，

沒久有聲 五年八月乙巳有星出王良西北行四丈有聲
而散占云有聲怒也主使出 七年九月甲午有星出室西
北行星體散落有聲明燭地

太宗太平興國二年三月丙午有大星出天棓光燭地 三年
十月甲寅有星出天船赤黃色如二升器至天棓星體散落
明燭地七月辛巳有星如稱權沒于婁八月壬寅有星出紫
微鉤陳東如盃大赤黃色向北速行近北極沒占曰外國有
使至是冬三佛齊吐蕃山後兩林蠻來貢 雍熙元年十月
丁酉有星出昴赤色東南蛇行二丈餘沒占曰外國使至又
為姦邪之象 二年正月壬戌有星出東井其大倍于金星

至輿鬼沒占云西表來貢是歲占城邛部川蠻西南蕃來貢

四年六月庚戌酉初有星出西北色青白入濁當戌地有

聲如雷占曰戌地兵飢流血是後李繼遷擾西鄙八月乙亥

有星出天關色赤黃尾貫月端拱元年四月辛亥亥時有

星出天津犬如醜赤黃色蛇行有聲明燭地犯天津東北星

占云枉矢見逆臣誅其年陳廷山謀叛磔于市閏五月辛亥

丑時有星出奎如半月北行而沒占云有溝瀆事乙卯有星

出紫微鉤陳西大如醜色青尾迹短赤光燭地北行而沒九

月癸丑有星出西南如太白有尾迹至中天旁出一小星行

文餘又出一小星相隨至五車沒占主兵戰賊欺二年四

月辛亥戌時有星出東南如升器色白墜于氏房間占云宰相出明年春趙普留守西京壬申有星出漸臺大如盃色赤東南急行掩左旗過河鼓沒 淳化元年九月辛巳有星出羽林色青南行光奪月占曰禁兵出十一月壬午流星出天闕如半月南行歷東井即位攝提至大角東北墜于地光芒四照聲如墮牆占曰秦燕分兵疫水旱 二年正月丙申有星出水府西大如杯色赤黃經參其分為三星相從至天苑東沒光燭地七月癸酉有星出雲雨側大如杯色青白緩行三尺餘沒占云為大風發屋折木 三年三月乙酉未時西北方有星西北速行大如杯色青白有尾迹占云有陰謀將

不和刑傷兵疫之象屬燕分四月己卯有星出文昌西南速
行至柳分為二星而沒六月己丑有星出天市垣屠肆東色
青白西北慢行丈餘分為三星從而沒 四年五月乙未平
明有星東南出南斗大如杯色青白西北行而沒占云眾星
沒流星出者為警動眾庶之象色青白主兵急流事速 五
年八月己酉常星未見有星出東方色青白東北慢行入澗
沒約出奎婁間占為兵眾之象九月庚午有星出昴北大如
杯緩行過卷舌至礪石沒占云星大事大緩行事緩為候兵
討賊殺將之象 至道元年四月乙巳常星未見有星出心
北大如杯色青赤急行而墮占云兵眾七月癸丑有星出危

大如杯、色青白、入羽林、没占云為兵大起將軍出 二年五月辛丑、有星出紫微北尾迹丈餘、彗而有聲、墜于室壁間、占云所墜之地破軍殺將、今墜北方、主北蕃君長災、五月己未日、承及地五尺間、有星出天中大如杯、色赤黃、有尾迹、東北速行三丈餘、没占云、動眾之象、荆楚有兵役、六月己卯、有星出牽牛西、厯狗國、光芒丈餘、墜東南及地、無聲、又有星出翼貫天、廟墜于稷星、東光燭地、占云、兵起、命將宜告廟、九月丁酉、平明有星出北方、大如杯、東行三丈餘、分為三星、從而没、占云、皇王發使慰四方、三年九月丁丑、有星二隕于西南、一出南斗、一出牽牛、有光三丈許、

真宗咸平五年三月丙午有星晝出心至南斗沒赤光丈餘八月辛巳有星出營室大如杯色白有光九月丙申有星出東方西南行大如斗有聲若牛吼小星數十隨之而墮戊戌又有星千數入輿鬼至中台凡一大星偕小星數十隨之其間兩星如升器大一至狼星一至南斗沒占曰燕朔民流徙又曰有兵不戰踰年契丹擾河朔請盟而去壬子有星出中天如在尾迹數道如迸火西流至狼弧沒六年五月乙未有星出於王良西又出北極稍東北至垣外沒有聲如雷占曰遠人有歸伏者其年高麗三佛齊大食蒲端國並朝貢七月壬辰有星出昴尾迹長丈餘色白隱隱有聲至狼沒占曰有

赦明年改元大赦十二月乙酉威虜軍有星大如斗歷城西
北尾迹長數里光焰地落蕃帳有聲如雷者三占曰有敗兵
流血殺將伏尸明年春李繼遷却西涼府為潘羅友所敗中
流矢死景德元年十月戊申天雄軍有星出北方大如斗
隕于西北赤光又餘二年正月丙子日未沒有星速流西
南大如杯占曰外國大使至是冬契丹使來四月癸卯有星
北流入天市如升器尾迹又餘十二月壬子有星出胃南聲
如雷光燭地三年五月乙卯有星出天津東北至紫微垣
北分為四星隨而沒色赤黃有尾迹丁酉有星出胃北入天
園逆為數星光燭地七月庚申有星出虛旁有短彗聲如雷

至東北沒赤光照地占曰秦楚有暴兵明年宜賊叛荆楚祭
兵十一月辛丑有星出中台東北速流有聲光燭地 四年
六月丙辰有星出北方慢流至八穀迸為數星沒光燭地七
月辛卯有星出敗瓜南大如杯慢流歷河鼓入天市至宗人
東北迸為二星淡色赤黃有尾迹十二月癸巳有星出弧矢
赤黃色尾迹又餘光燭地速流入濁占曰燕趙飢 大中祥
符元年二月戊申有星十餘急流入濁色赤黃有尾迹五月
辛未有星如太白出天市垣宗人東南尾迹又餘濶三寸向
北慢流至女林西分為數星沒九月乙丑有星出天倉急流
東南星體散落 二年三月己未有星如斗器出天津南至

離珠沒尾迹五尺餘照地明占曰后宮憂四月丙申有星出
八穀如升器有尾迹速流西至五車東進為數星而沒八月
丙申有星出北斗杓西南急行至即將西分為數段占曰燕
分飢 三年三月丁未有星出天市宗人東北如升器尾迹
二丈至旗進為數星沒光燭地五月丁亥有星出北斗魁如
桃色青白尾迹二丈餘乙丑有星出傳舍如桃色赤黃至紫
微沒壬申有星出建星如升器入南斗沒赤色有尾迹七月
庚辰有星出宗人西如升器北流入濁光照地八月丁未有
星出貫索如升器至帝席沒尾迹光明九月庚辰有星出軒
轅如半升器入太微垣沒十月甲戌有星出東方赤黃無尾

迹分為數星稍南沒 四年二月辛亥有星出東方尾迹赤
黃二又餘占為天保星所見吉四月乙丑有星出柳如升器
色赤黃至翼沒六月壬戌有星出觜東北如升器流入濁占
曰東北蠻夷憂七月壬申有星出紫微宮如升器速流至天
皇沒十月戊午有星出東北如升器流入濁又星出七星南
大如杯至天授沒尾迹又餘 五年二月戊申有星出貫索
經庫樓迸為數星沒八月戊午有星大小二十餘皆有尾迹
北流又一星如升器光燭地出紫微垣外尾又餘濶三寸許
東北流至傳舍沒占有大慶大赦是冬聖祖降故常所不原
者 六年十一月丁巳有星出太微即位東大如杯色赤黃

有尾迹至軫北進為數星没占曰大臣憂 七年三月丙戌
有星出南河大如杯至玉井没占曰秦齊飢四月辛酉其星
有出鈎陳大如杯尾迹赤黃占曰發大使宣急令是歲遣撫
巡江淮兩浙 八年二月丁卯有星出即將北進為三星四
月癸丑有星出兀西至右攝提進為數星隨而没五月乙酉
有星大如杯青白色出人星至騰蛇没光燭地八月己亥有
星出參大如杯南流入濁 天禧元年四月己巳有星出軫
大如杯至器府北没光燭地十二月癸巳有星出東北大如
杯尾迹赤黃急流西南没 二年八月乙卯有星二大如杯
尾迹赤黃一出五車一出狼北入濁九月戊子有星如二升

器出西南河色赤黃至柳沒 三年六月己有星出昴大
如杯急流至天倉沒十二月壬寅有星出軒轅大如杯尾迹
黃慢流至太微垣久之有聲如雷占曰女主之慶 四年正
月丁己有星出王良大如杯明照地至螣蛇沒占曰有大水
其年秋京師大雨河渠壅溢壞廬舍 五年四月己未有星
出南方如二升器北流入濁尾迹三文餘十月己己有星出
天津西大如杯

仁宗乾興元年五月壬午星出危大如杯赤黃色有尾迹速行
而東炸如迸火隨至羽林軍南沒明燭地占曰北夷兵動九
月己丑星出天市垣旁緩行經天過天市垣至營室沒占曰

大臣出使土功起十月丁酉星出右旗如太白西南速行至天升沒明燭地占曰兵動將軍勝天聖元年閏九月甲辰常星未見星出營室至外屏沒占曰主屋室修營事四年五月辛巳星出天市垣市樓東北流入濁占曰有街肆之事

五年九月丁未星出北辰沒于天床側占曰宮中不安宜審察之六年四月甲申夜漏欲盡有星大如斗器自北方至于西南光焰地有聲如雷曳尾迹長數丈久之散為蒼白雲八年二月丁酉星出軒轅大星側如杯速行至器府沒占曰憂火災十年三月癸巳星出中台貫北河入東井沒炸烈有聲明燭地食頃又有星出天市垣宗人側東流入濁

八月癸亥星出天船近鉤陳沒明燭地乙丑星出胃大如杯
有尾迹西北緩行進為六七小星相隨于大陵明燭地九月
丙子星出婁沒于雲雨側尾迹久方散明燭地續又星出北
辰西北速行至內階沒又有星出天苑沒于天園明燭地
景祐元年八月己卯星出東井行至厠星沒尾迹久方散明
燭地占曰井秦地主有水灾沒于厠為兵象九月己丑星出
東井如太白赤黃色有尾迹向東速行至柳沒光照地占曰
使出有火令其夜星出婁至奎沒明燭地占曰有溝瀆之事
二年八月庚申星出大陵如太白赤黃色東南緩行沒于
昂尾迹久方散明燭地占曰四夷有兵四年六月壬申星

出王良如太白、青白色、有尾迹東南速行至婁沒、明燭地占
曰、兵出、及倉庫官有憂、七月戊申、有星數百皆西南流、其最
大者一星、至東壁沒、光燭地久之不散、占曰、衆庶流移之象。

五年四月壬申、有星出中台如太白、青白色、有尾迹向北
速行入濁、明燭地占曰、將相憂、又星出天江如太白、有尾迹
西南速行至房沒、占曰、有大水。寶元二年三月癸丑、星出
右旗、赤黃、有尾迹向南速行、沒于建星、明燭地占曰、兵為亂
下有謀。康定元年三月癸丑、星出北斗北行入濁、明燭地
占曰、使出北方。二年九月己酉、有星出奎、如太白、赤黃、有
尾迹西行、沒于東壁、明燭地占曰、天下文章之士用。慶曆

二年三月庚戌星出鉤陳側如太白赤黃有尾迹西北緩行

至天棓没明燭地占曰天棓主忿爭刑罰藏兵禦難備非常也今流星入之主爭地七月乙丑星出西北方大如酸西北行又餘没色赤黃有尾迹明燭地十二月庚申有星出弧矢南行入濁赤黃有尾迹明燭地占曰秦分兵動及土功事起

五年六月星出奎如太白西行至天倉没尾迹明燭地

占曰有溝瀆事及兵起壬戌星出營室如太白赤黃色東南速行過危及虛有尾迹明燭地占曰北狄交兵齊分民有災

六年六月丁巳星出營室大如杯光燭地有聲北行至王

良没占曰兵出七年六月己巳星出天田赤黃色有尾迹

西南緩行至折威沒。占曰：邊將憂。九月星出天苑如太白南
行至天園沒。有尾迹。明燭地。占曰：牛馬禽獸多死。八年六
月己卯星出北斗。至即位沒。有尾迹。明燭地。占曰：兵出。八月
乙亥星出泉壁。赤黃色。東北速行至濁沒。占曰：天下文章之
士用。皇祐元年六月己巳星出弧瓠瓜。赤黃。有尾迹。向南
速行至建星沒。占曰：吳分有謀。二年四月癸未星出氐。赤
黃色。東南速行至心沒。有尾迹。明燭地。占曰：內使出。外使來。
德令宣布。國人有喜。四年九月星出紫宮。北辰側。赤黃色。
西南速行至貫索沒。尾迹凝。天明燭地。占曰：有赦宥。五年
九月乙亥星出參。如太白。西北速行至昴沒。有尾迹。明燭地。

占曰：兵出以禦胡寇。至和元年七月壬戌，星出王良色赤黃，向北速行至天船，沒有尾迹，明燭地。占曰：兵涉津梁。三年九月壬戌，星出東井，如太白，赤黃色，向北速行至文昌，沒有尾迹。占曰：秦晉分有水，將兵者還。嘉祐二年七月丁丑，星出王良，如太白，赤黃色，西南緩行至亢，沒有尾迹，明燭地。占曰：中官有咎。三年七月乙酉，星出北河，如太白，赤黃色，東南緩行，散為數道，至狼，沒尾迹，凝天。占曰：北河，胡漢之界，狼為盜賊，侵掠，宜警邊河，備兵草。四年五月癸丑，星出營室，大如杯，赤黃色，西南速行至羽林，軍沒炸，烈有聲。占曰：軍行炸而有聲者，戍兵不安。六月辛未，星出胃，沒于鉤陳，又有星出天

船至王良沒占曰倉廩官災津梁有阻策馬者憂九月己亥
星出紫宮鉤陳側大如盃東北速行曳尾長五尺初直後曲
流至北辰東沒沒後尾迹凝結如盤食頃散占曰流星大者
事大曲行者姦事也色赤兵象北行其事在北方今形體異
于常而小星十數南北分流衆庶流行之象宜審察姦謀以
備未萌 五年正月辛卯星出畢大如盃赤黃色速行至天
倉沒明燭地尾迹炸烈而散有聲如雷占曰流星大者事大
有聲如雷怒之象出于畢主邊事兵爭不利入天倉粟以兵
出八月庚申星出東壁東行入濁占曰文學之士有憂 六
年八月丁未星出狼大如杯至天社沒明燭地尾迹凝天良

以散占曰國多盜賊風雨不時 七年十月庚寅星出南河
至天社沒明燭地占曰邊兵不安風雨失序 八年七月乙
丑星數百縱橫西流占曰流星無名衆庶之象皆西流民勞
役

英宗治平元年二月星出紫宮鉤陳側西北入濁沒明燭地尾
迹炸烈有聲占曰后妃有憂 二年八月乙未星出河鼓大
如酸色赤黃速行至天市垣內宗星沒占曰有兵 三年四
月癸巳星出房至濁沒明燭地尾迹炸而散占曰卿有逐者
四年正月壬子星出亢西如太白東南急行至氐東沒赤
黃有尾迹主國有使清獄頌恩流于氏主上卿憂四月己酉

星出房東如孟口西南慢行至亢沒赤黃有尾迹明燭地散
如擺旗主有使出恤民或外國有使來八月星出柳東如太
白東急行入濁赤黃有尾迹主宗廟有喜賢臣任用十一月
星出五車東如杯口西南急流至昴北沒赤黃照地明主天
子遣使恤民五穀成亦主西夷交兵

神宗熙寧元年二月壬戌星出角東大如太白急行至翼沒赤
黃有尾迹主天子發使外國四夷受賜六月庚申星透雲出
天棓西如太白北急行至天市垣西牆沒赤黃有尾迹主歲
兵以備非常八月癸亥星出壘壁陣如太白緩行至狗國沒
赤黃照地二年二月星出平星南急行入濁沒赤黃有尾

迹主有執法正紀綱使出。四月辛酉，星出閭道如太白，東南
速行至東壁，沒青白有尾迹。主文章士用。天子好道，賢臣在
位，遠國來賓。七月丁卯，星出危南西南，急行至壘壁陣，沒赤
黃有尾迹。主天下安，五穀熟，土功興。十月己卯，星透雲出大
陵北如太白，西南急行至東壁，沒青白有尾，主用故臣，亦主
文章士為用。遠國來賓。三年二月己丑，星出太微垣西上
將南如孟西，急行入濁，沒赤黃有尾迹。明燭地主大臣于楚
分有外事。六月壬申，星出紫微垣西垣牆北，東北流至濁，沒
赤黃。主天子之使言兵事。十二月，星出外屏西南，速行入濁
沒。赤黃有尾迹。主人多不安。四年三月，星出天市垣內斗

星西北逆行至貫索西沒赤黃有尾迹主倉庫盈溢五穀豐
六月星出營室西南流至壘壁陣沒赤黃有尾迹主天子行
禮出賞國樂民安九月甲午星出紫微垣西牆東北逆行入
濁沒赤黃有尾迹主兵或土功之事五年七月己丑星出
七公南西南急行至天市垣西牆沒赤黃主五穀豐成倉庫
盈溢十月戊寅星出紫微垣內後宮東如杯北慢行入濁沒
主使出外夷主地動六年四月丙子星出貫索如杯慢行
至紫微垣牆上寧沒青白照地明主外國有使入六月辛卯
星出營室北如杯東南急行至壘壁陣沒赤黃有尾迹照地
明主使出言兵八月壬辰星出羽林軍西如杯南緩行入濁

沒青白尾迹分迸照地明主軍出邊鄙亦主軍中不和 七
年二月壬申星出天棊北東北緩行至造父沒青白有尾迹
照地明主兵出備邊鄙四月丙戌星出天市垣東北慢行至
候星沒青白有尾迹照地明主萬物貴八月癸未星出羽林
軍內如杯北慢行至大陵沒赤黃有尾迹主大軍出十月庚
子星出天倉西南慢流至敗臼沒如杯赤黃尾迹分裂照
地明主藏五穀待邦用亦主歲飢粟出 八年三月丁酉星
出積水東如太白速行至五車東沒赤黃有尾迹主錫貴九
月丙寅星透雲出河鼓北如太白東南緩行至危沒赤黃主
天下之民安五穀熟土功興十月乙未星出弧矢西北如杯

東南緩行至濁沒青白有尾迹照地明主南夷來貢國有賢
臣九年三月甲子星透雲出天市內宗正西北慢行至太
微垣五帝座沒赤黃有尾迹主執政憂人多死五月丁丑星
出尾北東南急行入濁赤黃有尾迹主後宮有子孫之喜六
月丙午星出東壁北如杯南急流至羽林軍沒赤黃有尾迹
主天子用故臣八月壬寅星出危北西南急流至濁赤黃有
尾迹照地明主天下不安十月丁未星出柳東速行入濁狀
如前主宗廟有喜賢臣任用亦主多雨十年正月辛巳星
出參西南速行至天苑沒主殺賤牛馬多傷四月甲辰星出
卽位北急流至下台南沒赤黃明燭地主大臣有咎六月乙

己星出王良東西北急流至紫微垣內鈎陳沒赤黃有尾迹
主兵將出十月己亥星出霹靂北西南急行至濁沒赤黃有
尾迹主陽氣大盛擊辟萬物 元豐元年閏正月甲辰星出
柳北西急行至天廩沒赤黃有尾迹照地明主穀熟六月甲
辰東南方光燭地有星如盂出匏瓜至內階沒分裂有聲如
雷主兵喪八月甲子星隔雲照地明東北急行至濁沒主有
大使出東北方其方流血十一月丙寅星出北河北東南急
行至弧矢沒赤黃有尾迹照地明主使出 二年十月二壬
子星出與鬼東北速行至軒轅沒赤黃有尾迹照地明主后
有喜 三年二月辛丑星出弧矢南東南速行至濁沒青白

有尾迹。主西戎有兵賊。五月辛未星出中台北。東南緩行至
天江。沒赤黃。主水泛溢。民飢。十一月丙辰星出厠星。東南
慢流。至濁沒青白。主晉分民疾。四年正月戊戌星出五車
北。如杯西南急流。至天困沒赤黃。尾迹分裂。主外國來貢。六
月戊寅星出紫微垣內厨南。如太白。慢流至大角沒赤黃。有
尾迹。主將出。九月己酉星出天街北。急行穿五車沒赤黃。有
尾迹。照地明。主粟麥貴。十一月乙未星出鈎陳北。東北慢行
至濁沒赤黃。有尾迹。照地明。主後宮有喜。五年四月庚申
星出角東南。急行至濁沒赤黃。主發使外國。七月辛巳星出
天市垣內。列肆西北。急行至濁沒赤黃。有尾迹。照地明。主人

主憂 六年閏六月丙子星出貫索東北西南急行至濁沒
青白有尾迹照地明主貴女憂九月癸卯星出五車東北急
行至濁沒赤黃照地明主有兵車出 七年四月辛未星出
平星東西南慢行至濁沒赤黃有尾迹主臣黜期半年 八
年二月庚辰星出太微垣左執法北東南急行至濁沒赤黃
有尾迹主大臣執法者憂七月庚申星出胃宿急流至天園
沒青白有尾迹照地明主外國來降倉庫盈實大臣及有優
恤事十月庚寅星出昴南急流至濁沒主有赦令恤民

哲宗元祐元年二月丙戌星出上台北向西北急流至王良南
沒赤黃有尾迹明燭地主遣使安撫四方搜揚草澤招賢集

德七月丁巳星出墳墓東慢流至壁南沒青白有尾迹明燭
地主大臣有喪十一月戊申星出紫微垣北西北急流至濁
沒青白有尾迹主使出 二年正月辛巳星出軫南向南急
流至濁沒赤黃有尾迹照地明主大臣忠諫賢人來國昌萬
物賤九月甲寅星出天市垣中山北西急流至天紀西沒赤
黃有尾迹照地明主有赦令賞賜 三年三月己酉星出亢
南向南慢行至濁沒赤黃有尾迹照地明主天子遣使清姦
獄頒赦令六月庚子星出壁南東南急流入羽林軍內沒赤
黃有尾迹照地明主文章士為用亦為兵起八月癸巳夕有
星自中天向東急流至濁沒青白有尾迹照地明主其下兵

戰 四年三月戊戌星透雲出織女東速行至天津西沒赤
黃明燭地主布帛貴九月壬午星透雲出天棓北速行至濁
沒赤黃有尾迹主修兵備十一月己酉星出司恠西南如杯
慢流至參旗沒赤黃有尾迹主使出其方亦主兵起 五年
七月辛未星出危如太白東南急流至濁沒青白有尾迹明
燭地主國安民豈及土功興十月己未星出車府西急流北
至天津西南沒青白有尾迹明燭地主兵軍動大衆行及主
河事 六年二月辛丑星出翼東南急流至濁沒赤黃有尾
迹明燭地主國人皆受恩賜七月癸亥透雲星二皆如太白
一出天倉東南急流至亢東沒一出奎東西南急流至壘壁

陣東沒赤黃有尾迹主有兵起侯王受賜十月丁卯星出王
良南東南急流至濁沒赤黃有尾迹主多風雨亦主遣將

七年二月戊午星出敗瓜東南急流至虛東沒赤黃有尾迹
明燭地主遣使或冢宰憂四月甲子透雲星出天市垣燕星
南急流至濁沒赤黃有尾主倉庫盈溢五穀豐八月辛未星
出奎距星西南急流至濁沒青白有尾迹明燭地主天下安
寧遠人來貢 八年正月甲申星出天市垣內候南東南急
流至濁沒赤黃有尾迹明燭地主民流十月戊申星出天梧
東南北流至濁沒赤黃有尾迹明燭地主有赦及宥大臣罪
紹聖元年二月丙午透雲星出壁東慢流入濁青白有尾

迹主天下文章士登用賢臣在位遠國來賓六月星出入星
南急流至牛没赤黃有尾迹明燭地主牛馬昌盛十月甲申
星出天倉南慢行至上台没赤黃有尾迹明燭地主賑貸亦
主兵及大將憂 二年三月丙辰星出天津東北向東慢流
至室北没青白有尾迹明燭地主使出及外國使至五月甲
寅星出閣道北東北急行至濁没青白有尾迹明燭地主風
雨十月庚寅透雲星出張南東南急流至濁没赤黃有尾迹
明燭地主天子社稷昌 三年二月丙子透雲星出太微垣
慢流至濁没赤黃有尾迹主使出五月己未星出平星西如
杯大急流至濁没青白有尾迹明燭地主臣有黜者 四年

六月甲申星出亢西南向西急流至濁沒赤黃王使出清犴
獄頒恩赦九月乙卯星出天囷東之南急流入濁沒主帝王
布令德外國貢異寶及賞大臣市有火災十二月丁未星出
天倉北西南急流至壘壁陣北沒赤黃又星出天倉西北西
南急流至濁沒青白皆如太白有尾迹明燭地主大兵起斧
鉞用亦主賑貸及遠方賢人至元符元年三月甲戌星出
天乳北急流至角而沒赤黃有尾迹明燭地主禮義教興遣
使及鄰國使入貢六月星出室如杯至壁東沒青白有尾迹
主軍糧豐五穀成文士入賢人用二年三月癸卯星出靈
臺北向西慢行至軒轅沒赤黃有尾迹明燭地主賢臣在位

天子有子孫之喜十月辛丑星出女西北急流至牛西北沒
青白有尾迹明燭地主五穀貴有水災

徽宗建中靖國元年正月星出西北如盂東北急流入尾距星
沒青黑無尾迹明燭地主風雨時稼穡成崇寧元年三月
星出張如金星西南急流至濁沒赤黃有尾迹明燭地主諸
侯受賜天子宗廟社稷昌十月壬子星出天船如盂急流至
五車沒青黑有尾迹聲隆隆然主大水或曰水旱不時二
年正月戊申星出水位如金星急流至北河沒青白有尾迹
明燭地主大水六月戊午星出亢西南急流入濁沒赤黃有
尾迹明燭地主天子遣使清獄頒恩九月辛巳星出牛西南

慢流至狗國沒青白有尾迹明燭地主民流亡十二月丁未
星出大陵如金星至騰蛇沒赤黃有尾迹明燭地主其下有
積尺一曰水旱兵喪 三年四月戊申星出軫西北慢流入
太微垣內屏星沒赤黃有尾迹明燭地主外國有急使期不
出一年十二月甲子星出天大將軍西北急流入王良沒赤
黃無尾迹明燭地主大兵將出 四年正月甲申星出角如
孟西南慢流入濁沒青白無尾迹主天子發使外國五月庚
申星出河鼓西北急流入濁沒青白無尾迹主諸侯作亂一
曰兵起十二月甲午星出參如杯東南慢流入軍市沒赤黃
有尾迹明燭地主大將出一曰有赦又云飢 五年六月庚

午星出西咸東北急流入天市垣內沒青白有尾迹明燭地
乙酉星出庫樓向西急流入濁沒赤黃有尾迹明燭地主鄭
分受兵九月癸卯星出天船慢流至諸王沒青白有尾迹明
燭地主水旱不時十二月壬戌星出奎向南急流入天倉沒
青白有尾迹及三文明燭地聲散如裂帛主天子用文偃武
一曰歲熟 大觀元年二月丁卯星出參如杯西南急流入
濁沒赤黃無尾迹明燭地主天子遣使安邊一曰米賤有穀
二年十二月癸卯流星出奎如盃西北急流入造父沒青
白有尾迹照地明有聲主有溝瀆事 政和元年四月丙辰
星出亢如盃西北急流至右攝提沒赤黃有尾迹照地明主

兵來入計於王庭五月辛巳日未入星隕東南主下有兵流血
二年九月乙卯星出斗如杯西南急流入濁沒赤黃有
尾迹照地明主大臣死四年九月庚子星出危墳墓如孟
東南急流入羽林沒青白有尾迹照地明主人民安土功興
一曰有喪諸侯憂七年十二月甲子星出胃東男南如孟
西北急流至天大將軍沒赤黃有尾迹照地明主天子以金
玉賞大臣外國有來降者一曰趙分五穀熟八年九月庚
辰星出斗魁南如孟東南急流至天淵沒赤黃有尾迹照地
明主不出其年兵起一曰大臣死江河溢宣和元年三月
丁卯星出柳如孟東北急流入太微垣赤黃有尾迹照地明

主多雨水一日周公憂兵起外國或有急使十月戊子星出
雲雨如孟西南慢流入羽林軍內沒青白照地明主后憂疾
大風雨 二年十二月辛巳星出奎西南如杯西南慢流至
壁沒赤黃有尾迹明燭地明主其下破軍殺將一曰天子好
道用故臣 四年十一月丙寅星出王良北如杯急流至紫
微垣內上輔北沒赤黃有尾迹照地明 五年二月丙午星
出北河東北如杯東南慢流至軫沒赤黃有尾迹照地明主
天下有難 六年七月丁酉星出太陽守如孟東北急流入
濁沒赤黃有尾迹照地明主將相憂兵革興 七年十月戊
子星出王良北如杯急流入紫微垣上輔北赤黃有尾迹照

地明主大兵將起

欽宗靖康元年二月丙辰星出張如金星東南急流至濁沒青
白有尾迹照地明主有赦令三月壬辰星出紫微垣內鉤陳
東南如金星東北慢流至濁沒赤黃有尾迹照地明主兵動
起土功興六月癸丑星流大如五斗器衆光隨之明照地起
東南墜西北有聲如雷庚申星出紫微垣內華蓋東南如金
星向北急流至左樞沒主發使有赦二年正月乙未大星
出建向西南急流至濁沒赤黃有尾迹照地明主吳秦有兵
高宗建炎四年十月辛未流星出壁占文章士用自是范冲等
召紹興元年三月甲戌流星出東方晝隕占其下有急兵

破軍殺將其地流血七月乙未朔流星出河鼓占兵出十一月丁巳流星出天槍北占兵大起谷鉞用于是命韓世忠提兵入建州討范汝為平之明年岳飛大破曹成二年三月甲午流星出紫微垣華蓋西南占主內使出戊午流星出自權星西南照地明占有使來論兵事未幾王倫自虜還乃遣潘致堯等使虜金人遣李永壽等來議事四月乙巳流星出太微垣西占執法星北占主大臣有外事出天庭之門天子使也次月呂頤浩出師六年十月流星出壁西北占天下文章士與賢士並用于是胡安國尹焞召七年八月有星隕于汴京是年金人廢偽齊八年十一月乙巳流星出天

國東北占有賑發事于是以米二萬石付岳飛賑京西湖北
飢民又以錢五十萬付吳玠犒軍 二十六年六月乙亥流
星出東北方照地明占流星晝隕其北大戰流血千里分屬
燕野在幽 二十八年六月癸巳有星從西北離地約高一
丈至西北没 三十一年六月甲子飛星出氐宿入角宿赤
黃色初小後大有小星相隨占為兵八月壬午流星約長三
丈晝隕占營頭也若晝見橫天明者臣下圖議誅罰善良

孝宗隆興元年七月丙申流星出天市垣內向西北慢流至右
攝提西没臨没時炸散小星二十餘顆赤色有音聲有尾迹
占天子欲有赦賜事庫倉盈溢五穀豐君喜入右攝提星則

有外兵事來入計王庭炸散有聲皆為怒氣天下不安急使
馳驛色赤為兵旱火八月庚申流星出羽林軍向東南急流
至濁沒九月庚戌流星出紫微外垣座鉤星向西北急流抵
紫微垣內座尚書沒十一月丁未飛星出天船星急流向紫
微垣外座內厨西北沒炸出二小星青白色 二年二月辛
酉飛星出權星慢流至太微垣內五帝座大星西南沒微有
尾大如木星占兵起外國當有急使為大人憂十一月壬午
朔流星晝墮占臣下圖議誅罰忠良癸未夜流星出犯弧矢
急流至天廟東南沒大如金星十二月壬午亦如之占兵起
屠城殺將 乾道四年八月丙辰流星如蛇出自十二諸侯

國代哭之側至師門之下沒占哭泣之象 五年九月丙辰
流星如蛇入天棊占流星如蛇行者姦事也大而光者其貴
人且衆也入天棊星為天子之先驅分爭及刑罰 六年九
月辛巳有星出狼星穿入弧矢星至濁沒如上星大赤黃色
有尾迹後化為紫細白雲九刻乃散占兵起當有屠城殺將
尾迹化為白雲其名大滑流血積骨縵縵如秦野在雍戎狄
將亡之兆 七年七月戊戌東北方蒼黑雲間有透雲流星
如拳大急向西北方至濁沒有尾迹照地如電占大使也凡
流星暉然有光白長竟天曰人主之星相從三軍于是次年
春遣虞允文出蜀治兵事九月甲午西南方流星急流至濁

沒有尾迹照地明主兵刑民飢 淳熙七年五月乙亥流星
出天市垣東海慢流炸作三小星青白色尾迹照地如蠶口
占青為憂飢白為兵 十一年四月乙丑流星透雲出自中
天慢流向東北方沒有尾迹炸散作小星從青白色有音聲
大如金星是為流星夕墜者占下有兵疫炸散有聲怒之象
十三年九月辛亥流星大如金星其色先赤後黃白尾約
二尺委曲如蛇行有類枉矢占為以亂伐亂又云枉矢臣不
忠不良天下恐又云政暴虐枉矢如蛇行姦事也

寧宗慶元二年九月甲午流星晝墜四年六月甲午亦如之

四年七月壬寅流星如椀大出羽林軍之下青白色占為憂

為兵 嘉泰二年四月辛巳流星晝隕占色赤為兵旱是歲
大旱 四年十一月庚午流星出天津急流天市垣占火災
民疾 開禧元年十二月庚子星出中天赤色大如太白向
濁沒占為兵旱火 二年六月癸丑流星出招搖入庫樓

嘉定六年五月癸亥流星晝隕占其地大戰覆軍流血千里

九月癸卯流星夕隕占其下兵疫色赤為兵旱丁巳流星晝

隕于是金國亂十月戊戌流星出自昴宿西南慢向天廩東

南沒占兵起他國使來有赦令入天廩色赤為旱火黃則大

熱 七年四月壬午流星出自軫宿距星東南西慢流至濁沒

有使出辛卯流星出自天津西南慢向心宿西北沒是秋金

人使來索歲幣 十六年十一月壬戌流星怒聲如雷

理宗寶慶元年十一月癸巳有流星大如太白 二年四月辛亥

亦如之 紹定元年六月己酉流星晝隕 二年正月庚辰

九月壬辰星出大如太白 三年十一月丁未流星晝隕

四年七月庚戌有流星大如太白 九月甲辰流星晝隕 五

年閏九月己酉有流星大如太白 端平元年六月丙戌有

星西南行大如太白尾迹明照地 二年四月戊子有流星

大如太白 六月庚辰流星晝隕 七月丁酉有流星大如太白

辛丑流星晝隕 十月辛卯有流星大如太白 三年五月己

卯有流星出心大如太白 六月丁亥流星夕隕 嘉熙元年

正月壬午流星大如太白九月癸丑流星出七公西至濁沒
十月戊戌有流星大如桃三年閏四月甲子有流星大如
太白六月甲辰朔流星晝隕七月辛卯有流星大如太白八
月癸亥流星晝隕九月乙未_有流星大如太白三年三月
甲戌流星晝隕八月辛丑_有流星大如太白四年正月辛巳
亦如之四年二月辛丑流星晝隕三月乙酉亦如之六月
戊午有流星大如太白淳祐元年六月癸酉有流星大如
太白己卯流星晝隕三年六月甲戌有流星大如太白出
於氏八月乙卯流星晝隕四年四月丁丑有流星大如太
白出尾距星下六月乙未_有流星大如太白出於畢六年

七月癸酉有流星出自室大如太白九月朔大星隕于江陵
府境內聲如雷甲子有流星出於斗大如太白 七年九月
丙辰有流星出於室 八年六月甲辰流星出河鼓大如太
白十月丙戌星出角宿距星 九年六月壬戌晝南方有星
急流至滿沒大如太白十一月壬申有流星出自織女星
十年三月丙申有流星夕隕 十一年七月丁丑有流星出
於畢大如太白赤黃色八月己丑朔流星夕隕 十二年四
月庚申有流星出自角亢大如太白八月癸丑星出角色赤
照地 寶祐元年四月丁巳有流星大如太白二年七月庚
戌三年七月辛酉亦如之十月丁丑有流星出自畢 五年

七月丁卯有流星大如桃 六年九月戊辰有流星透霞

開慶元年六月己亥星出斗宿河鼓急流向東南至濁没赤

黃色有音聲尾迹照地明大如太白 景定元年七月壬申

星出東南大如太白十月乙卯星出東北急流向太陰有音

聲尾迹照地明大如桃 三年四月甲辰有流星大如杯六

月己酉有流星大如熒惑九月丙子有流星大如太白閏九

月丙戌流星透霞大如太白庚子有流星大如太白 四年

五月戊戌流星出自角宿距星六月丁卯流星出河鼓八月

乙卯流星出自天倉 五年二月壬戌流星出自畢五月甲

午流星出自河鼓大如太白七月己卯流星出自右攝提

度宗咸淳二年六月甲戌星出左攝提三年七月庚寅星出

昴宿東南急流至濁沒赤黃有尾迹照地明大如太白四

年七月戊午有星出氐宿西北急流入騎官星沒赤黃有尾

迹照地明大如桃五年五月庚申有星自斗宿距星東北

急流向斗宿至濁沒六月庚寅星出斗宿七月壬戌東南有

星自河鼓距星西北急流至濁沒

恭帝德祐元年四月癸亥有大星自心東北流入濁沒

帝昴祥興元年六月己巳有大星東南流墜海中小星千餘隨

之聲如雷數刻乃已八月有星墜廣州南初隕色紅大如箕

中爆裂為五既墜地聲如鳴雷一食頃止

遼太祖天顯元年七月甲戌夕大星隕於幄前 九年五月癸

丑大星晝隕九月庚子西南星隕如雨

金太宗天會十一年七月己巳昏有大星隕於東南如散火

熙宗天眷十四年三月丁酉夜中星搖九月癸未有星大如缶

起西南流於西正十一月己巳狼星搖

海陵貞元元年四月戊寅有星如杯自氐入於天市其光燭地

正隆三年正月丁亥有流星如杯長二丈餘其光燭地出

太微沒於梗河之北 六年五月夜有大星流入東京留守

第中

世宗大定二年十月戊辰有大星如太白起室壁間沒於羽林

軍尾迹長文餘

章宗泰和六年八月癸丑夜半有流星如太白其色赤起於婁宿八年十一月庚子未刻有流星如太白者二光芒如炬幾一丈起東北沒東南

衛紹王大安元年正月辛丑有飛星如火起天市垣尾迹如赤龍之狀移刻散二年正月庚戌朔日中有流星出大如盆其色碧西行漸如車輪尾長數丈沒於濁中至地復起光散如火移刻乃滅

宣宗貞祐三年七月庚申有流星如太白其色青白有尾出紫微垣北極之旁入貫索中四年正月乙卯夜中天有流星

大如日，色赤，長丈餘，墜於西南，其聲如雷。興定元年十月癸丑夜，有流星大如杯尾，長丈餘，自軒轅起，貫太微，沒於角宿之上。二年八月壬戌，有流星大如杯尾，長丈餘，其光燭地，起建星後尾中，一云自東北至西南而墜，其光如塔狀，先有聲如風，後若雷者，三牕紙皆震。三年七月壬寅，初昏，有星自西南來，其光燭地，狀如月，而稍不圓，色青白，有小星千百環之，若迸火，然墜於東北，少頃有聲如雷。

元世祖至元十七年十一月十九夜，有大星墜於平章政事廉希憲正寢之旁，流光照地，久之方滅，是夕希憲卒。三十二年十二月丙申，有大星墜於東北，庚子開府儀同三司太傅

伯顏卒

成宗大德二年五月己酉撫州崇仁縣星隕為石 三年九月
壬辰流星色赤尾長丈餘其光燭地起自河鼓沒於牽牛之
西有聲如雷 五年十月辛卯夜有流星大如杯色赤尾長
丈餘光燭地自北起近東徐徐而行分為二星前大後小相
離尺餘沒於危宿

武宗至大元年七月庚申流星起自鉤陳南至於大角傍尾迹
約三尺化為白氣聚於七公南行圓若車輪微有銳絰貫索
滅

泰定帝泰定四年十月乙巳晝有流星 致和元年五月庚辰

流星如缶大光明燭地

順帝元統二年七月己酉夜流星如酒杯大色赤尾迹約長五尺餘光明燭地起自天津之側沒於離宮之南 至元四年九月癸酉奔星如酒杯大色白起自右旗之下西南行沒於近濁 至正十年十一月冬至夜陝西耀州有星隕於西原光耀燭地聲如雷鳴者三化為石形如斧削之有屑擊之有聲 十一年正月丁卯蘭陽縣有紅星大如斗自東南墜西北其聲如雷 十六年十月丁未大名路大名縣有星如火從東南流芒尾如曳慧墜地有聲火焰蓬勃久之乃息化為石青黑光瑩形如狗頭其斷處如新割者有司以進太史驗

視之天狗也命藏於庫十一月丁亥流星如酒杯大色青白
尾迹約長五尺餘光明燭地起自西北東南行沒於近燭有
聲如雷 十七年閏九月癸卯有飛星如盃色青光燭地尾
約長尺餘起自王良沒於鈎陳之下十二月己亥申時流星
如太白大尾迹約長三尺餘起自太陰近東往南行沒後化
為青白氣 十九年正月癸丑流星如酒盃大色赤尾迹約
長五尺餘起自南河沒於螣蛇其星將沒迸散隨落處有聲
如雷四月己丑建寧路甌寧縣有星墜於營山前其聲如雷
化為石十月辛巳流星如桃大色黃潤後離一尺又一小星
相隨色赤尾迹通約長三尺餘起自危宿之東緩緩東行沒

於畢宿之西 二十年閏五月乙亥流星如桃大色赤尾迹
約長丈餘起自房宿之側緩緩西行沒於近濁 二十二年
九月己巳流星如酒杯大色青白光明燭地 二十三年六
月庚戌星隕於濟南龍山入地五丈掘之得石如磚褐色上
有星如銀破碎不完七月乙酉有星墜於慶元路西北聲如
雷光芒數丈久之乃滅 二十四年六月甲辰河南府有大
星夜見南方光如畫丁未大星隕照夜如畫及旦黑氣晦暗
如夜 二十五年五月辛酉流星如酒杯大色青白光明燭
地起自房宿之側緩緩西行沒於太微垣右執法之下 二
十六年六月癸酉流星如酒杯大色青白尾迹約長尺餘起

自心宿之側東南行光明燭地沒於近濁七月辛巳朔石州
大星如斗自西南而落十一月己丑流星如酒杯大分為三
星緊相隨前星色青明後二星色赤尾迹約長二丈餘起自
東北緩緩往西南行沒於近濁二十七年七月丁酉絳州
星隕光耀如晝二十八年三月有星流於東北衆小星隨
之其聲如震

明太祖洪武三年十月庚辰有赤星如桃起天將至壘壁陣抵
羽林軍爆散有聲五小星隨之至土司空旁發光燭天忽大
如椀曳赤尾至天倉沒須臾東南有聲七年十二月庚申
夜四鼓有流星青赤色尾跡長五尺餘起紫微垣北斗魁上

約流五尺餘發光照地徐徐西南行至軒轅右角旁分作五
星沒 十四年五月己酉有星黃白色自羽林軍西南委曲
行復還至羽林軍沒 十五年十一月己巳有流星初出大
如雞子青赤色有尾起天苑西南行文餘發光燭地大如椀
至游氣中沒 二十一年八月乙巳赤星如杯自北斗杓東
南行三文餘分為二又五文餘分為三經昴宿復為二經天
廡合為一沒於天苑 二十二年七月甲午夜有星自外屏
西南流三文餘化為白雲 二十八年八月丁卯夜有星大
如椀尾光燭地起河鼓入天市垣至候星旁沒後有二小星
隨之 三十年五月庚申夜流星大如雞子尾跡有光自天

厨入紫微垣後有二小星隨之至游氣中沒

成祖永樂元年閏十一月丁卯有星色蒼大如斗光燭地出中
天雲中西南行隆隆有聲入雲中 二年五月丙午有赤星
大如斗光燭地出中天西北行入雲中九月庚申赤星大如
椀有尾光燭地出羽林軍西南行後二小星隨之 三年三
月己未夜有星大如椀青赤色有尾光燭地出角宿有聲西
北行至井宿炸散 六年五月丙辰赤星大如椀光燭地出
狗國東南行入游氣後二小星隨之 十四年五月甲寅有
星大如椀青赤色出天桴旁如遺火光東南行至雲中 十
六年十二月辛巳有星大如斗色青赤光燭地自柳東行至

近濁 二十一年九月庚子夜有星大如月青白色光燭地
尾迹黃色起壘壁障西方星東南行至羽林軍 二十二年
五月己亥有星如盞色青白光燭地起東南雲中西北行入
雲中有聲如砲七月庚寅有星如椀色赤有光自奎入參炸
散眾星搖動九月戊戌有星見斗宿大如椀色黃白光燭地
有聲如撒沙石

宣宗宣德元年六月戊辰有赤星大如椀光燭地出紫微東蕃
外入紫微垣十二月己巳有星大如椀光赤出卷舌東行過
東井墜地有聲如雷 三年二月壬戌有流星大如斗色赤
光燭地起右攝提有聲如雷後有五小星隨之至近濁炸散

七年正月戊寅有流星大如椀青白色光燭地起中天北
行有聲如雷十二月乙未曉刻有流星大如椀色青白光燭
地出軒轅西南行至雲中有聲如雷 九年二月己未有流
星大如斗色赤有光西行入濁十月甲辰朔有流星大如椀
色青白有光起正東游氣行文餘大如椀至東南濁有聲如

雷

英宗正統元年八月乙酉昏刻至曉大小流星百餘 四年七
月辛未朔夜北方有星大如雞子流二丈餘發光大如椀有
聲尾迹赤出紫微垣右樞旁東南行至天囷尾迹化為赤白
雲徐徐南行八月癸卯自夜達旦流星大小六百六十餘

十二年六月戊寅夜西方有星如椀流文餘發光如斗色青
白光明燭地起天津東南行至羽林軍尾迹炸散後有十餘
小星隨之有聲如雷 十四年十月癸丑有星大如杯赤光
燭地自三師西北抵少弼尾迹化蒼白氣長五尺餘狀如蛇
徐徐西行十二月戊申有星大如杯色青白有聲光燭地自
太乙旁東南行文餘發光大如斗至天市西垣沒四小星隨
之

景帝景泰二年六月丙申大小流星八十有五八月壬午有赤
星二一如斗光燭地一出紫微西蕃北行至陰德三小星隨

之一出天津東南行至河南十餘小星隨之尾迹炸散聲如雷

英宗天順三年四月癸丑有星大如椀赤光燭地自左旗東南行抵女宿尾迹炸散九月乙酉赤星大如杯尾迹曲曲如蛇西行至危宿 四年八月辛亥南方有赤星大如椀發光如斗有聲如雷起昴宿西南行至近濁 五年九月庚子有流星大如杯色青白光燭地出危宿東南行至北落師門化蒼白雲長丈餘曲曲南行 八年二月壬子有星如椀光燭地自天市至天津尾化蒼白氣如蛇形長丈餘良久散

憲宗成化元年正月己酉朔有流星光燭地自左攝提東南行至天市西垣 四年七月己未北方有流星青白色光明燭

地自閣道旁西北行衝鈞陳尾迹後炸散 六年十月丙午
夜東方流星赤色光明燭地自昴宿東北行至井宿 十二
年十一月乙丑延綏波羅堡有星二形如轆軸一墜樊家溝
一墜本堡紅光燭天 十六年九月癸卯有流星大如盞赤
色光芒燭地自婁宿西北行至霹靂旁尾迹散 二十年五
月丙申有大星墜番禺縣東南聲如雷散為小星十餘既而
天地皆晦良久乃復九月己亥山西澤州星隕聲如雷十二
月己卯廣東陽江縣有大星墜西方光焰燭天有聲如雷
二十一年正月甲申朔申刻有火光自中天少西下墜化白
氣復曲折上騰有聲踰時西方有赤星大如椀自中天西行

近濁尾迹化白氣曲曲如蛇行良久正西轟轟如雷震二
十三年十月丙子有大星起西北亘東南光芒燭地蜿蜒如
龍

孝宗弘治元年八月戊申巳刻南方流星如蓋自南行丈餘大
如椀西南至近濁尾化白雲曲曲蛇行而散二年七月戊
辰夜遼東都司有大星光如電起東北墜西北有聲如雷十
月甲午遼東廣寧衛有星自西北往東南光如電聲如雷
四年十月丁巳有星赤光如電自西南往東北聲如鼓隕光
山縣化為石如斗光州之同城亦見大星飛空如光山所見
十一月甲戌星墜真定西北紅光燭天五年九月丁亥河

南信陽州有大星紅光映天自西北流至東北而隕聲如鼓
七年三月丙辰山西解州有星大如杯散為五各長數尺
焰騰似火既而天鳴有聲如鼓河南陝州有星大如斗光芒
照地自東南流於西北凌散而隕聲如雷五月宣府山西河
南俱星晝隕 八年四月丁巳山東歷城縣有星自東北流
墜西南紅光燭天聲如雷辛未有星如輪流至西北隕於鉛
山縣其聲如雷 九年閏三月己未平涼東南有流星如月
紅光燭地至西北止既而天鼓鳴 十年正月壬子有星大
如斗色黃白光長三十餘丈一小星隨之隕於寧夏西北隅
天鳴如雷者數聲鄜州有星自西北流至東北天鼓鳴四月

辛丑犬同陽和衛有星紅光如火自東南流至西南而隕聲如雷九月乙巳有星如斗光掩月流自西北隕於永平天鼓鳴有聲十月壬申山東萊州星隕天鼓鳴十一年正月癸亥有流星隕於肅州大如房響如雷良久滅二月戊辰寧夏有流星大如斗天鳴若雷十月壬申曉東方赤星如椀行文餘發光如斗東南行小星數十隨之十一月丁巳遼東寧遠星隕聲如雷十二年九月癸亥永城有星如火天鼓響如雷十月庚寅有流星隕於鳳翔光如火聲十四年七月戊申夜南城有火星如蛇紅光青焰自西流東約九丈餘聞七月辛巳山東有星大如車輪赤光燭天自東南往西北隕於

壽光天鼓鳴八月丙辰廣西融縣有星大如箕尾長丈餘自西南流至西北十五年十月丙午濟寧有星起西南光如電至東北隕天鼓鳴十六年正月己酉南京有星晝流

十七年三月丁卯夜合浦有流星大如箕紅光燭地自西北至東南而裂聲如鼓乙亥安邱有流星於西北天鼓鳴五月辛丑南京有星晝流十八年正月庚寅遼東星隕大如斗癸巳登州等府有流星晝隕光丈餘已而天鳴者三九月庚寅濟寧魚臺有流星隕於西北天鼓隨鳴

武宗正德元年三月壬午夜流星如椀青白色光燭地起天市西垣內東北行至紫微垣東蕃內尾迹炸散聲如雷二小星

隨之天鼓隨鳴癸未具有星大如月光如電自東南流於西
北繼而天鼓鳴如雷六月丙寅戌刻山東沂州有星如斗色
赤自東南流於西北後一小星隨之十月癸亥慶陽有流星
聲如雷十二月庚午有星如椀墜寧夏中衛空中有紅光大
二畝鞏昌有流星紅光如火自東北往西南聲如雷數小星
隨之 二年二月乙酉有星大如盤色赤自西北流往東南
八月戊寅夜流星如彈色青白光燭地起畢宿正南行至雲
中沉沉有聲如雷己亥寧夏有大星自正南流西南而墜後
有赤光一道濶三尺長五丈十一月丙辰兗州濟寧魚臺見
星紅如火而墜天鼓鳴 三年十一月己亥夜東方流星起

井宿東北行至軒轅青白色發光如蓋尾迹炸散 四年八月丙戌夜大星見山東益都臨淄樂安等縣紅光如虹起西南東向北而散 五年四月丁亥雷州有大星如月自東南流西北分為二尾如彗隨沒聲如雷辛亥四川通江縣有星晝隕犬如斗芒青尾長丈餘 六年二月丁未夜寧夏有大星隕於西南天鼓鳴三月丙子山東曹州有流星見西南光燭天頃之天鼓鳴如雷五月庚戌朔山東泰安州有星流空中天鳴如雷六月壬午江西臨江府夜見火星交流頃之火大如車輪尾長數丈隕府城東北吉安府火星如斗赤光燭天自西北流東南墜聲如雷八月癸卯有流星如箕尾長四

五丈紅光燭天自西北轉東南變三首一尾墜四川崇慶衛
色化為白復起綠燭高二丈餘聲如雷震十二月丁亥有流
星如斗墜於山西澤州西南天鼓隨鳴 七年三月丁未夜
河南柘城流星如火自東北至西北天鼓響如雷六月壬子
陝西漢中府火星如斗起西南墜於東北天鼓隨鳴八月丙
午河南開封府夜有流星如月起東南至西北散天鼓隨鳴
十月壬戌山東兗州府夜有流星如斗光赤聲震如雷 八
年八月甲辰廣東雷州府有流星大如月起東南沒於西北
聲如雷 九年正月戊辰揚州府通州有流星大如斗自西
南至東北光耀如晝天鼓隨鳴二月丁未夜山東單縣有流

星大如斗紅光如電自東北至西南沒天鼓隨鳴十月庚寅
朔夜四川松潘衛有星大如斗尾長八尺自東流西聲如雷
戊午大足縣有流星如火自東南往西北尾長數十丈光芒
燭地少頃雷震南方竟刻而止十一月辛酉有流星如火墜
於陝西鞏昌府正北聲如雷 十年四月南直隸通州有星
如火自西北流東南聲如雷 十一年二月甲戌有星隕於
薊州大如斗隨有白氣蜿蜒上升久之乃滅 十二年六月
壬申江西建昌府有星自東南流至西北光焰燭天天鼓隨
鳴癸酉寅時廣東增城有星如斗化為白氣而沒九月丙
子夜南方流星如蓋甲午夜西南二方流星俱如蓋戊戌夜

南方流星亦如蓋庚子昏刻北方流星如蓋發光如椀後有
五小星隨之 十三年正月癸丑夜陝西莊浪衛有流星如
電自西北墮於東南頃之天鼓鳴 十四年六月戊寅夕有
大星墮於西北十月壬戌東方流星如蓋赤色光明照地起
下台東北行至招搖尾迹化為白氣 十五年正月丁未酉
刻有星墮於山西龍舟谷巡檢司廳事二月甲申山西平陽
府及洪洞趙城縣有流星如火自東而西有聲如雷山東臨
淄樂安縣亦如之四月丙戌陝西鞏昌府有星如日色赤自
東方流西南而墮天鼓鳴 十六年四月戊子酉時陝西米
脂縣西北方有星大如斗隨有紅光一道約三丈餘半空冉冉

冉轉動向西北移時變白氣而沒滅五月癸酉遼東有星大
如杯尾長丈餘光如月自東西流如箭而墜天鼓鳴者三九
月丁巳瀋陽有星起西北光如火有聲往東方落天鼓鳴如
雷十二月乙未甘肅行都司有星如火大如車輪墜地復上
而散

世宗嘉靖元年十月壬午夜流星如盞大赤色尾迹有光起自
鈎陳西北行至紫微西蕃外尾迹化為白氣曲如蛇行良久
乃散 四年五月有星流於杭州尾長數十丈光明燭地自
東至西火塊亂落有聲如雷 五年十月壬戌蔚州衛有星
隕如升天鼓鳴 七年十月河間星隕如雨 十一年正月

星隕於衛、十二年正月甲辰朔衛輝府星隕如斗聲如雷
鳴三月辛亥肅州衛星落有聲十月丙子流星如盞光照地
自中台東北行近濁尾迹化為白氣四更至五更四方大小
流星縱橫交行不計其數至明方息辛巳星隕如雨 十三
年四月壬寅鳳陽星隕如斗火光燭地天鼓鳴如雷 十四
年九月戊子開封白晝天鼓鳴有星如盃東南流眾小星從
之如珠 十九年五月辛丑夜星隕棗強為石四 二十年
六月癸未大同府有大星東南流光如炬天鼓鳴九月甲辰
陝西淳化縣有星大如斗東南流聲如雷 二十一年十月
壬寅四川建昌衛有火星如車輪從北方出流行帶有尾至

南方散聲如雷地微震、二十二年二月癸卯潞安府星隕
聲如雷四月丁亥遼東鐵嶺衛有火星隕如斗 二十四年
五月癸未夕有星大如斗首綠尾頰自北流入南熒然有聲
二十五年八月戊戌午時南方流星大如椀赤色光如斗
起中天西南行至近濁 三十二年九月庚午高唐州有星
如日起自東北飛向西北而隕光燭天 四十年六月己未
朔昏中有星流斗女間墜地大如雞子光燭天 四十一年
正月庚子流星晝隕有光

穆宗隆慶元年十二月丁亥西寧衛有星光從正北起隕於西
南天鼓鳴從西南方起往東北止甲午辰刻有流星如盞大

青白色自中天東行尾迹有光長二丈餘 二年正月初九日未時新城縣天鼓鳴者三迅響若雷星隕二三月碣石村有星畫隕化為黑石重千觔十一月丁未山西太原府有星隕如斗尾長二丈餘天鼓隨鳴是夜交城星隕火光自東北往西南落亦天鼓鳴 五年六月甲午萬全都司星隕大如斗

神宗萬曆三年五月癸亥晝景州天鼓鳴隕星二化為黑石十一月丁酉四川松潘有流星二各長丈餘起正東向西南流去天鼓隨鳴 四年十一月甲午有四星隕費縣火光照地天鼓鳴質明落赤點於城西北色如硃砂長二里濶一二尺

是月臨漳有星長尺許白晝北飛 十三年四月壬子萬全
都司星隕如火七月辛巳有星如盃隕於沈邱蓮花集天鼓
鳴 十五年三月戊午大星墜於平涼光如電天鼓鳴六月
丙寅平陽晝隕星丁卯辰刻有星如斗隕如於平陰震響如
雷 十六年九月奇嵐星隕有聲如雷化為石長三尺餘形
如枕 十七年正月庚申有星隕西寧衛大如月天鼓鳴癸
亥山西新開口星隕 十八年二月丁酉順德府星隕如火
隱隱如鼓聲三月乙卯山西代州夜初更星隕聲如雨光如
燭少頃天鼓鳴如雷庚申有火星流於西北聲如雨天鼓大
鳴 十九年五月己丑甘肅鎮城隕星二壬寅陽和星隕七

月中戌西寧已煖等處星隕天鼓鳴十一月丁丑夜火星隕
於永昌古城堡二十年二月丙辰有三星隕閩縣東南五
月乙丑夜有星大如斗自西北流至東南而隕四小星隨之
皆紅綠色尾長三四丈丁亥酉刻有星自中天西流青白色
尾有光七月辛酉福建星隕如電二十一年二月十九日
青山口永平臺東北有星飛來大如敵臺炯炯有聲餘光若
彗約長二十餘丈投西南崖下十月戊辰陝西星隕大如斗
天鼓鳴二十二年八月壬戌東北方流星如盞赤色有聲
如雷三小星隨之十月己酉夜有星隕渤海所南門接上燒
燬殆盡壬戌夜馬城堡星隕大如斗天鼓鳴二十三年九

月癸巳夜火星墜永寧堡大如房 二十五年八月乙酉天
鼓鳴有飛星帶火墜於河內 二十七年三月癸巳遵化縣
有星自西北流至東北光如皎月庚子蓋州衛天鳴連隕大
星三 二十八年正月河南有飛星大如升帶火光墜地
三十年八月甲寅五更有長星頭大紅色尾尖白色發響一
聲裂開中紅邊白自東飛向西南前直後曲能動紅色星團
圓一半徐散九月己未朔有大星見東南赤如血大如椀忽
化為五中星更明久之會為一大如麓辛巳有大小星數百
交錯行十月壬辰五更流星起中天光散七道有聲如雷
三十一年四月甲寅有流星大如椀赤白色尾迹有光 三

十二年三月戊辰大同陽和等處見流星大如斗先白後赤
光芒燭地 三十三年九月戊子有星如椀墜於南京龍江
後營光如火至地遊走如熒移時滅明日復有星如月從西
北流至閩兵臺分為三墜地有聲十一月有星隕南京教場
入地無迹 三十四年五月丁丑卯刻有流星如盃赤色尾
迹有光 三十五年六月庚戌當塗繁昌等縣見流星如月
光芒數丈十一月癸巳有星隕於涇陽淳化諸縣大如車輪
赤色尾長丈餘聲如轟雷 三十八年二月癸酉西南方流
星大如椀二小星隨之山西有流星大如斗墜陽曲西北碎
星不絕天鼓齊鳴 三十九年三月壬子東方流星如椀赤

色照地七月丁卯流星如挽青白色光明燭地尾迹炸散起
織女西北行入貫索 四十一年正月庚子真定天鼓鳴流
星晝墮有光四月廣安州星墮聲如雷 四十三年三月戊
申晝星墜清豐東流村聲如雷 四十六年三月清明日夜
一鼓時東北有星大如斗赤色向南行有聲若雷雞犬皆驚
其光燭地纖毫畢見墜於西聲聞者三為石二重一百三十
觔十月辛酉有星如斗墮於南京安德門外聲如霹靂塵化
為石重二十一觔同日萬善縣星墜十一月乙巳有星如斗
自北墮南聲如雷炸裂分散 四十七年七月初四日戌時
有血光星長數十寸照地如晝自淮南流入西北墜地

熹宗天啟元年七月甲辰流星如練赤色後有小星數百隨之
起西北傍女宿十月甲戌流星如蓋白色自北飛流女宿及
斗宿 二年九月甲寅固原州星隕如雨十月壬辰蔚州有
星如斗隕於西北隨時正北天鼓大鳴 三年三月乙巳有
星隕薊鎮大如車輪火光四燭九月壬子南方流星大如蓋
赤色尾迹有光自虛宿東南行入壘壁陣後二小星隨之
五年六月甲申夜廣州見大星如毬光長數丈自東流入於
南忽震一聲散作十餘道照耀如日樞馬雞犬皆驚須臾滅
七月丙子流星如蓋尾迹有光自室入危後二小星隨之
七年正月甲申雲南宣撫司有大星飛隕三月己巳有流星

大如椀色赤黃光照地起天棓西北行入紫微垣過少宰入
鉤陳尾迹炸散為白雲

愍帝崇禎六年九月丁未太康縣星隕為石十二月己卯星隕
有聲如雷光竟天 九年六月丙子有流星大如斗色赤芒
耀數十丈聲如雷 十二年四月有星隕於鳳翔不及地旋
轉如冶金良久漸高飛去照數十里 十五年夏星流如織
十七年三月己丑朔有星隕於御河營頭晝隕聲如雷